

ad Chronicon Marmoreum.

149

nebat imperium, inde autem ad bellum Trojanum cum ceteris Græcis profectus ^a à Sarpedone interfectus fuisse dicitur. ^b Dorei vero, quos ille in Rhodum secum abduxerat, ibi semper manebant Lindum, Jalysum, & Camirum incolentes, quibus circa 115 annos post Trojæ excidium alii se jungebant ^c Dorei, ex iis qui in Atticam regnante Codro expeditionem suscipientes proposito istius regionis obtinendæ exciderunt, eorumque auxiliis Con insulam occupabant. Post Homeri deinde ætatem ^d Anthes è Trœzenia aliam in Asiam Doriensium eduxit coloniam, & in Chersoneso Rhodo vicinâ Cnidum, & Halicarnassum condidit, quæ cum aliis quatuor Doricis civitatibus Co scilicet, Lindo, Jalyso, & Camiro fœdus ineuntes cum iisdem in Asia ^e Doridem, Hexapolin constituebant, quæ postea exclusâ à fœdere Halicarnasso Pentapolis vocabatur. E Lindo ^f Antiphemus & Lacijs fratres circa Olympiadem 26 colonias eduxerunt, eorumque hic Phaselidem in Pamphylia, ille Gelam in Sicilia condidere. Hylli filius erat ^g Cleodæus, quo duce Heraclidæ exactis 50 annis, quibus ex pactis obligati erant à bello Peloponneso inferendo abstinere, tertio in avitam patriam reditum tentant, sed cum nondum venisset tertia post Hyllum ætas, quam Pythia per tertium fructum significabat expectandam, priusquam in Peloponnesum redirent, in hac expeditione non minus infelici successu, quam in duabus prioribus à Peloponnesis victi repressique in Doridem amisso duce, ^h qui in prælio occubuit, iterum redierunt. Cleodæi filius erat ⁱ Aristomachus, qui, cum ei Pythia victoriam promississet, si per viam *πεννησών* rediret, quarti Heraclidarum in Peloponnesum descensus dux fuit, sed cum ille oraculum non recte intelligens per Isthmum Corinthiacum exercitum duxisset, eodem modo quo pater victis repulsisque suis in prælio occidebatur, Aristomachi autem filii ^k Temenus, Cresphontes, & Aristodemus tandem intelligentes per tertium fructum, quem Pythia dixit expectandum esse, priusquam Heraclidæ in Peloponnesum redirent, tertiam generationem, & per viam *πεννησών* non terræ, sed maris Angustias significari, classem Naupaçti in Ætoliâ (quæ urbs ^l ἀπὸ τῶν τριῶν ναυπηγίας appellationem sortita est) fretum Corinthiacum transitori parabant, sed dum ibi manebant, quod Hippotes Phylantis filius Antiochi Herculis filii nepos Carnum vatem, qui futura prædicens Doriensium castra intraverat, putans magum esse ab hostibus in exercitus perniciem immissum ^m occidisset, pestis exercitum invadit; ab oraculo igitur edocti mali causam vatis cædam fuisse, Hippotem exilio damnant, & in vatis honorem festa ⁿ Carnia instituerunt, ^o quæ à Lacedæmoniis ceterisque Doribus in Peloponneso ab eo tempore Apollini, ut pro morte vatis placaretur, quotannis semper quam sanctissime fuerant celebrata. Cum jam parata esset classis Heraclidæ ab oraculo moniti, sibi ^p trioculum ducem constitutum esse, Oxylo Ætolo Thoantis, qui Ætolis in bello Trojano imperaverat, nepoti, quem unoculo equo infidentem obviam habuerant, exercitus imperium committere, sub cuius auspiciis in Peloponnesum transeuntes, ^q circa 80 annos post Trojæ excidium Elidem, Argos, Messeniam, & Lacedæmonem expulsi Æolibus & Achæis, quorum hi in Joniam postea Achæam dictam duce Tifameno, illi in Asiam duce Penthilo Orestis filii inde commigrarunt, occupavere, quibus inter Duces divisus ^r Oxylys Elidem, ^s Temenus

^a Homerus II. 4. v. 659. ^b Herodot. lib. 1. Strabo lib. 14. ^c Strabo lib. 14. ^d Strabo lib. 8. pag. 374. & lib. 14. pag. 656. Pausanias lib. 2. pag. 142. ^e Herodotus lib. 1. ^f Eusebius in Chronicis. Pindari Scholiastes ad Olymp. 2. Athenæus lib. 8. Stephanus Byzantinus in Γένεσ. Thucyd. lib. 6. ^g Apollodorus lib. 2. Herodot. lib. 6. Suidas in Κλειδομαίῳ. Ælian. Hist. Animal. lib. 12. c. 32. Tzetzes in Lycoph. Scholiastes Pindari ad Od. 7. Pausanias in Laconicis. ^h Eusebius præp. Evang. lib. 5. pag. 124. ⁱ Pausanias in Corinthiacis. Apollodorus lib. 2. Herodot. lib. 6. Eusebius præp. Evang. lib. 5. c. 20. ^k Apollodorus lib. 2. Pausan. lib. 2. 3. 4. 5. & 7. Velleius Paterculus lib. 1. Euseb. præp. Evang. lib. 5. c. 20. Thucydides lib. 1. Isocrates in Panathenaico. ^l Strabo lib. 9. p. 427. Stephanus in Νάυπηγος. ^m Apollodorus lib. 2. Eusebius lib. 5. cap. 20. Conon apud Photium narrat. 26. Pausanias lib. 3. ⁿ Suidas in Κάρνια. ^o Athenæus lib. 4. & lib. 14. Ælianus var. Hist. lib. 12. c. 50. Anagraphe Olympiadum, cum Eusebianis edita ad Olymp. 26. ^p Pausan. lib. 5. Apollodorus lib. 2. Strabo lib. 8. ^q Clemens Alexand. Strom. lib. 1. Thucydides lib. 1. Velleius Paterculus lib. 1. Tatianus. ^r Pausan. in primo Eliacorum. Strabo lib. 8. Apollodorus lib. 2. ^s Pausan. lib. 2. Strabo lib. 8.

Agros,